

## Kerwe 2001.

Schunn wieder iss en Johr vergang,  
wo ich hier owe hann gestann  
un hann gekrisch met meiner Gret,  
hoch lebt die Kerb so laut wies geht.  
So wollen mir es auch dies Johr halte,  
ich lade eich in Junge un Alte.  
Denn es gehört zum gute Ton,  
hoch zu halte die Tradition.  
Die Verpflichtung war uns alle klar,  
drum hann mer wie jedes Jahr,  
uns hier owe ingefunn,  
un einen schönen Strauß gebunn.  
Hier uffgesteckt für jeder Mann  
Un ein Jeder met uns Kerwe feire kann.  
Unser Stadt un dess iss wohr,  
feiert dess Johr 725 Johr.  
Doch es hat sich neilich grad bewiss  
Dass unser Kerb viel älter iss.  
Am Stiftsplatz war es do ich glab,  
do stieß mer beim Aushub uff ein Grab.  
Mer hats geöffnet un der Daus  
Als Grabbeigab fand mer en Strauß.  
Der Mann der in dem Grab gebett,  
hielt in de Hand ne Kerweredd  
un uff de erschte Seit muß ich eich sah,  
stand ebbes vun de Ulrich Monika.  
Seit dem wäs bei uns en jedes Kind,  
dass mir Erfebacher älter sind.  
Mer han ein Grund zum feiern heit,  
drum ein Hoch uff unser Kerb er Leit.  
Gret gebb mer noch en Schluck eruff  
Un ich schlah mol dess Sünderegister uff.

In de Hohenzollernstroß do wohnt ne Frah  
Die liebt die Katze muß ich sah.  
Doch do neulich gab`s Theater  
Es hat gehimmelt ihr alter Kater.  
Staatstrauer war do angesah  
Die Frah dut nur noch schwarz als trah.  
Er Mann erklärt ihr kurz un knapp,  
dess war deine letschte Katz, finn dich met ab.  
Doch an ihrem Geburtstag, als sie net draht denkt  
hann ihr die Kinner ne neie Katz geschenkt.  
Un dass dess Kätzje immer hat warm,  
traht sie wo sie ah hiengieht dess Dier uff erm Arm.  
Morjens, dess war so ne Sach  
hat sie met äner Hand es Frühstück gemach  
Nach getaner Arbeit setzt sie sich  
zum frühstücke zu ihre Leit an de Tisch.  
Doch plötzlich kreischt sie un macht Rabatz,  
mei Arm iss leer, wo iss die Katz.  
In alle Ecke unner fluche  
Dut mer im Haus dess Kätzje suche  
Sie iwerleht dann saht sie grad,  
es letscht war ich an de Brotschublad.  
Sie saust dort hie macht uff ganz sacht  
Sie sieht er Katz drin un sie lacht.  
Ach wie konnt ich dann vergesse,  
dass du so gern dusch Knerzjer fresse.  
De Annemarie Roschel sah ich grad,  
hall die Katz fern vun de Brotschublad.  
Denn sunscht kennt ders einmal blühn,  
de Vatter leht se in die Brotschneidmaschin. Die Musik spielt  
em Annemarie ganz froh,  
dess schöne Lied vum Katze-Clo.

Vun deJahnstroß owe en Ehepaar  
geht Sunntags in sei Kerch dess iss doch klar  
Der Weg vun dehäm bis do iss sehr weit  
Un weil sie hann so wenig Zeit  
werd meistens un dess iss doch klar  
met em Mercedes in die Kerch gefahr.  
Vor ein paar Woche war`s auch so,  
die Zwä waren Sunntags widder do.  
No de Kerch, wie sie es gewöhnt jo ware,  
wollten sie nach hause fahre.  
Sie kummen do an de Parkplatz, welch ein Schreck,  
kä Auto do, der Benz war weg.  
Der Mann saust erum ganz iwerzwerch,  
sucht newer un hinner unsrer Kerch,  
Der Pfarrer Sunntag kummt vorbei  
der guckt met ihm noch in de Sakristei.  
Der sieht uff ämol nur noch die Schance,  
dass er geparkt in de Stauchwiese in de Straß.  
Auch dort dut net sein Auto steh,  
der Mann dut ball am Rädche dreh.  
Er kriecht nix mer uff die Reih,  
jetzt helft nur Änns, uff die Polizei.  
Dem Mann sei Frah die setzt sich hie  
Un dut den Ablauf des Morgens nach voll-zieh.  
Do wurd es ihr uff ämol klar,  
dass sie geloff sin un net gefahr.  
Weil die Sunn so schä vum Himmel hat gelacht,  
han mer uns zu Fuß heit morje uff de Weg gemacht.  
Im Dieter Denzer du ich dess ähne sah,  
froh es nächstmol es Suse als dei Frah.  
Denn dess saht der eins- zwei – drei,  
ob du geloff bisch, oder du hasch es Auto debei.  
Ah ich sah im Denzer Dieter noch Änns,

mach der ins Sacktuch als en Knippel wann de bisch ohne Benz.

Die Musik spielt em Dieter die Melodie die süße Alzheimer lässt grüße.

En Junggesell vun de Jahnstroß do,  
musst als iwer die Ausetrepp uffs Clo.  
Im letschte Winter, es war kalt un garnet nett,  
unser Freund lag in seim warme Bett,  
do iwerkummt ihn ein menschlich Rühre  
un er muß rauß, er muß maschiere.  
Im Schlofanzug zieht er los,  
macht die Hausdeer uff, guckt uff die Stroß,  
Die Stroß war um die Zeit mensche-leer  
do knackt es hinner ihm un zu war die Deer.  
Im Schlofanzug hat do unser Mann  
frierend uff de Trepp gestann.  
Es helft ihm nix, denn ei der Daus,  
er war allä heit nacht im Haus.  
Die Lage hat sich bedrohlich zu gespizt,  
do fällt ihm in, dass sei Tante en zwätter Schlüssel besitzt.  
Im Schlofanzug macht er sich uff Trab  
un holt bei seiner Tante Martha de Schlüssel ab.  
Wie er häm schleicht un de Schlüssel hat  
do kummt der letschte Bus der Stadt  
die Leit erschrecken in dem Bus  
un rufen: Do laaft der Münchner-Aloisius.  
Im Wilfried Ruhl sah ich im Vertraue,  
es war höchste Zeit jetzt um zu baue.  
Denn kriesch du wieder nachts Druck uff die Blos,  
brauchst du nimmer iwer die Stroß.  
Die Musik bringt der zu Gehöhr,  
der Weg zum Clo war kalt un schwer.

Am erschte Mai, was war dess ne Sach,  
do hann so en paar ne sportliche Wanderung gemacht.  
Vun de Breitenäcker ne junge Frah,  
hat es erschte mol er neie Wanderschuh ah.  
Met dünne Strümp sie do nei schluppe dut,  
uns war es gewiss, dess do geht net gut.  
Am Anfang ging es wie geschmiert,  
die Frah iss bestens mit marschieret.  
Doch nach en paar Kilometer ging es los,  
an ihre Fieß zeigte sich die erschte Blos.  
Zu erm Mann saht do die geplagte Frah,  
geht dess so weiter musch du mich trah.  
Mer dut zur Rast sich nieder-hocke,  
die Frah die stöhnt : Het ich nur Socke,  
die ich zieh könnt in die Schuh eninn,  
do wer die Sach jo halb so schlimm.  
Do hat sich sofort en Kavalier gemeld,  
un hat sei Socke zu Verfügung gestellt.  
Erleichtert hat die Frah sie angezoh,  
dann ging es weiter fröhlich froh.  
Uff ämol dut sie verwundert stutze,  
warum dun die Annre dauernd an de Nas rumbutze.  
Die Unterhaltung wurde kurz un knapp,  
die Freunde rücken vun ihr ab.  
Sie dut verstohle um sich blicke  
un merkt zu er fliehen kä Mücke.  
Do kummt die Frah uff ämol druff,  
es steigt ein Gestank er Bä eruff.  
Diesen Geruch kann sie im Vertraue,  
es fiehl ihr wie Schuppe vun de Aue,  
denn ihr war es jo bekannt,  
dass ihr Socke Lieferant,

hier bei uns un in de Stadt  
die aller geruchvollste Schwäbfüß hat.  
Ich sah zu dere Sach net viel,  
doch ich rot der Birgitt Diel,  
muß du nochmol Socke hann,  
nemm der en paar vun deinem Mann.  
Die Musik spielt jetzt der Birgitt ganz trocke  
Hilfe er Leit , mer dampen die Socke.

Weil mer grad beim Wandern sinn  
Fallt mer noch was vun some Wandersmann in.  
Er wohnt do unne in de Hohenzollern Gass,  
un es Wandern macht dem Rentner Spaß.  
Met seiner Frah dess iss doch klar,  
wandert er mit schun manches Jahr.  
Ab un zu do dut der Gute,  
die Vorfahrt mache, ver ne neie Route.  
Do iss der Mann neilich halt,  
met seinem Benz gefahr durch Feld un Wald.  
Denn führ ich die Wanderung, saht der Mann,.  
Muß die ah en bestimmter Schwierigkeitsgrad hann.  
Do de zu hat er Wege ausgesucht,  
die er hinne no selwert hat verflucht.  
So fuhr er en Feldweg, meiner drei,  
weit ab vun de Zivilisation durch die Walachei.  
Daß der Feldweg net befestigt war, hat er net bedenkt,  
so hat er plötzlich mem Benz im me Grabe gehenkt.  
Er hat mem Ato gejackelt, dann stieg er aus,  
er hat nämlich festgestellt, er kummt allä nimmi raus.  
Jetzt hat er's so weit gebrung  
un er macht sei eigene Wanderung.  
Stunnelang lief er grad aus,  
dann kam er an ein Bauernhaus.

Met em Traktor fahrn die Zwä dann hie,  
ver dess Auto raus zu zieh.  
Jetzt unser Wanderer wieder lache kann,  
er entlohnt noch unsern Bauersmann,  
Do druff beschließt de Roschel Werner beherzt,  
die Wanderroute wird abgekerzt,  
Ich sah im Vatter vun de Leiter,  
wander du nur schä brav weiter,  
doch bisch du widder an ner Vorfahrt drah,  
nemm glei en Traktor du ich der sah.  
Die Musik spielt der so laut sie kann:  
De Vatter iss ein Wandersmann.  
Un mach ich unner wegs mol schlapp:  
Dann holt mich met em Traktor ab.

Hier les ich an dieser Stelle,  
was vun drei Erfebacher Junggeselle.  
So machen jo die drei kä Stunk,  
awer sie kriehen nie genunk.  
Neilich waren die drei grad  
Zu me Geburtstag ingelad.  
Wie die Gäst räumen das Feld,  
hann sich die drei noch en Taxi bestellt.  
Sie wollten in die Stadt ins River-side,  
die hann noch uff um diese Zeit.  
Doch irgend was iss schief geloff,  
sie sin in Scharlys Disco ingetroff.  
Dort hann sie sich dann am me Tisch verschanzt,  
sie blieben do , es wurd getanzt.  
Sie sahn do bleiben mir bis in die Puppe,  
es sinn hieße Öfe in dem Schuppe.  
Änner hat sich beim danze besonders abgerackert,  
un so ne Disco-Maid schä angebagert.

No some heiße Tanz, ich sahs im Vertraue,  
wurd es unserm Tänzer ganz schwarz vor de Aue. Un als er  
hoch guckt unser Feger,  
stand vor ihm en Baum langer Neger.  
Sorry dut do de Jürgen Göbel sah,  
ich du mich net wä dem Märe met der schlah.  
De Thomas D. , dem hats bressiert,  
er hat sich schun vorsorglich verdünnisiert.  
De Texter machts geschickt,  
als wer er am Tisch schun ingenickt.  
Der Neger gebt sich zu friede so  
un unser Junggeselle sin schnell vun danne gezoh.  
Ich sah denne Drei, es iss net iwertrebb,  
als Freunde hann er en schlechtes Bild abgebb.  
Die Musik spielt eich zu eierm Schade,  
es waren drei Kameraden die zogen in die Disco ein,  
doch als sie waren gefordert, da war der Eine allein.

Eine Frau, man glabt es net  
iss schun wieder in de Redd.  
Sie basst es Jahr iwer uff wie ne Hechelmaus,  
dass nix iwer er Kapriole kummt eraus.  
Sie saht als bis kurz vor de Kerb, gell es fallt eich nix in,  
Dessjohr bin ich net in de Kerweredd drin,  
Doch wie alle Jahr hat sie sich geschnerrt  
Denn sie hat sich mol wieder geerrt.  
Die gute Frah, dess wissen mer alle gar,  
gehört in de Hall schun zum Inventar.  
Wern Hochzeite, Geburtstage do abgehall,  
helft sie in de Küch do in de Hall.  
Während einer Geburtstagsfeier war es dann so,  
die Frah musst emol dringend uff es Clo.  
Im Dameclo hat sie verricht er Sach

un die Deer von inne zu gemacht.  
Lange Zeit ging do erum,  
un die Frah iss änfach nimmim kum.  
En annrer Gast war uff em Männercclo newe drah  
der hört die Hilferufe vun der Frah.  
En junger Helfer springt do schnell enaus,  
un er hört ah die Hilferufe aus dem Clo eraus.  
Holt mich raus, ich bin fascht ganz benumm,  
ich hock schun do fascht ne ganze Stunn.  
Der junge Mann war so galant,  
un klettert zum Monika in de Clo iwer die Wand.  
Vun inne macht er ihm die Deer dann uff,  
es Monika sterzt uff ihn glei druff,  
un saht zu ihm, mei lieber Bu,  
mein Lebensretter der bisch du.  
Ich sah im Ulrich Monika kurz un knapp,  
schließ du niemals mer ne Clodeer ab,  
sunscht bassiert der es dier armen Tropp,  
du verbringst dei halwes Lewe uffem Topp.  
Die Musik spielt im Monika heiter un froh,  
Ich sitz so gern allein im Clo.

Ein Mann, wohnhaft im Brunnering,  
drehte neulich folgend Ding.  
Der Name spielt do mol kä Sach,  
der Mann war mem Auto in Siegelbach.  
Er geht in än Geschäft un kaaft was in,  
sei Auto steht draus in änner Parkbucht drin.  
Dann kam er aus dem Lade raus,  
steit in sein Auto, wollt nach Haus.  
Doch er musste warte, konnt net los ,  
es kam grad der Bus uff dieser Vorfahrtsstroß.  
Doch plötzlich der Mann der war ganz platt,

weil der Bus vor ihm gehalten hat.  
Der Busfahrer der war galant,  
winkt ihn aus dem Parkplatz mit der Hand.  
Er wollte sich noch bedanken, war doch klar,  
do sieht er, dass der Busfahrer sein Schwager war.  
So ist er aus dem Parkplatz raus gestoßen,  
am Bus vorbei bis Mitte Straße.  
Beinahe wäre die Sache gelungen,  
do ist von hinten ein Mercedes gekommen.  
Do gab's einen mächtigen Bums er leit  
und beim Mercedes drin die Seite.  
Und seit der Zeit do was ein jeder.,  
hör niemals auf den Jochen Schröder,  
denn machst du dass, --- ist es so eine Sache,  
er kommt halt mal von Siechelbach.  
Mer leh ich ans Herz, mach nicht mir so Bosse,  
und du dich niemals auf Annere verlosse.  
Die Musik spielt jetzt dem armen Wicht:  
Einem Siechelbacher traut man nicht.

Jetzt geb ich mit dieser Sache mal Ruh,  
und wende mich dem Strauß do zu.  
ER ist gelungen doch do der Brave,  
ich du dich jetzt mit Riesling daafe.  
Bleib schön do henke, du die Kerbe bewache,  
du sollst uns noch lange Freude machen.  
Eich do unne du ich sah,  
feiert Kerwe wie mir ah,  
Dess Haus do ist bestens vorbereitet  
eich zu beköstigen liebe Leit.  
Ver jeden do dess Haus was hat,  
drum trinkt und esst eich richtig satt.  
Auch der Montag net vergessen,

do sehen mer uns beim Schlachtplatt esse.  
Jetzt Straußborsch ruft ämol noch,  
die Erfebacher Kerb lebt hoch.  
Ich geh jetzt runner vun der Leiter ,  
ich feier Kerb bei eich jetzt weiter....